

选举典

選舉典第八十四卷

會試部彙考二

皇清

順治三年

大清會典凡會試中額順治三年初行會試取中四百名四年再行會試取中三百名其應試舉人憑文取中不分南北中卷六年會試取中四百名凡主考官順治三年定會試屆期禮部開列內院大學士學士六部尚書侍郎都察院堂官職名題請

簡用又定同考官二十員內用翰林院官十二員六科官四員吏部司官一員禮部司官一員兵部司官一員戶刑工三部司官每科輪用一員各該衙門推舉資俸優深才望素著者送內院裁定入闈閱卷凡入場官員順治三年定

命禮部堂官一員充知貢舉禮部司官二員充正副提調其監試御史二員巡察御史二員俱坐名

題遣

大清會典凡副榜順治初定舉人中副榜者免其

廷試禮部卽咨送吏部授職

順治八年

大清會典順治八年

恩詔會試照三年例取中四百名南卷取中二百三十三名

浙江江西福建湖廣廣東五省江寧蘇州松江常州鎮江徽州寧國池州太平

淮安揚州十一府廣德一州

北卷取中一百五十三名

山東山西河南陝西四省順天永平保定河間眞定順德廣平大名八府延慶保安二州奉天遼東大寧

萬全等處

中卷取中一十四名

四川廣西雲南貴州四省廬州鳳陽安慶三府滁和徐三州

凡起送順治八年題准新舊舉人直

隸十二月起送山東山西江南陝西限十一月起送江南浙江江西湖廣限十月起送福建廣

東廣西四川限九月起送如司府稽遲違限聽禮部查叅

順治九年

大清會典凡八旗會試順治九年初行會試於進士定額外取中滿洲進士二十五名蒙古進士十

名漢軍進士二十五名各衙門他赤哈哈番筆帖式哈哈番亦同舉人會試如滿洲蒙古內有通

漢文者翻譯漢文一篇未通漢文者作滿文二篇漢軍試義與鄉試同又遇

恩詔加中滿洲進士十名蒙古進士五名漢軍進士十名

大清會典凡就教順治九年題准舉人願就教職者不拘科分禮部查明具題同貢生一體

廷試

順治十一年

大清會典順治十一年題准部院衙門他赤哈哈番筆帖式哈番俱不准會試其鄉試已經中式者

俱准會試

順治十二年

大清會典順治十二年議准止分南北卷其中卷安慶廬州鳳陽三府滁和徐三州鄉試原係江南省中式歸併南卷四川雲南貴州廣西四省歸併北卷每科臨場照應試舉人多寡隨時分派南北中額不必預定南北名數分卷又定場後中式硃卷分發房考各散本房諸生謄寫限五日繳還禮部又按會典順治十二年增滿監試御史二員滿巡察御史二員其受卷彌封謄

錄對讀監門等官俱由內院中書科國子監光祿寺上林苑順天府京衛等衙門官取用其巡綽官用京衛守備千總等弁供給所用禮部司官俱預行各衙門開送坐名派定執事屆期具題

順治十三年

大清會典順治十三年題准減定會試中額滿洲中二十名蒙古中五名漢軍照舊中二十五名

順治十四年

大清會典順治十四年停止八旗考試 又按會典順治十四年停分房取士之例各經同考官公閱公薦增閱春秋禮記官各一員

順治十五年

大清會典順治十五年題准會試額數減半每科取中進士一百五十名 又按會典順治十五年令應開送同考各衙門除曾經直省典試及會試分房不開外其見在各官臨期密開職名移送禮部題請

欽點凡正副主考同考及執事等官二月初六日於午門前行禮出赴禮部簪花筵宴主考同考給與綵緞表裏出場次日行禮簪花筵宴

順治十六年

大清會典順治十六年雲貴蕩平再行會試增額三百五十名

順治十八年

大清會典順治十八年

恩詔會試中式照丙戌科增額四百名仍分南北中卷照應試舉人多寡隨時定額

康熙三年

大清會典康熙三年題准監試御史巡察御史停其坐名題請通行開列密請

欽點其內外簾執事等官禮部將應送各官盡行開列與正副考官一併題請

欽定 又按會典康熙三年題准

命下日卽入場停止行禮筵宴 又按會典康熙三年題准停止會試副榜 又按會典康熙三年

古今圖書集成
題准舉人考授內閣中書及現任者俱准會試

康熙五年

大清會典康熙五年題准直隸舉人責成順天等府起送各省舉人責成該布政司起送除欠糧緣事已經革黜及現在議處未結與罰科丁憂患病等項確察不送外其應會試舉人於會試年前詳察造冊限十一月初一日起至會試年正月初十日止赴部投文如過期投文者不准收試該地方官不照定限送部并遲誤給文者禮部指名題參

康熙七年

大清會典康熙七年題准舉人教官仍准會試

康熙九年

大清會典康熙九年會試加中額三百名 又按會典康熙九年復行禮筵宴 又按會典康熙九年題准八旗復行會試滿洲蒙古另編滿字號取中進士四名漢軍另編合字號取中進士四名 又按會典康熙九年議准會試關係取賢大典展限於二月初一日以內投文准其會試

凡會試下第舉人例給路引以便下科起文會試發榜後禮部卽劄行順天府并發直省點名原冊令照例逐名給發

康熙十一年

大清會典康熙十一年議准監試巡察仍增滿御史各二員

康熙十四年

大清會典康熙十四年題准出場次日考試官並各舉人照常行禮筵宴一次餘俱停止

康熙十五年

大清會典康熙十五年

恩詔加中四十六名 又議准雲南貴州四川廣西四省照順治十二年暫歸北卷廬州鳳陽安慶三府滁和徐三州暫歸南卷其南北卷中式數目仍照卷數多寡取中不預定南北名數 又按會典康熙十五年

恩詔滿洲蒙古進士加中二名漢軍進士加中二名是年題准停止八旗考試 又按會典康熙十

古今圖書集成
五年題准會試三科舉人方許就教

康熙十八年

大清會典康熙十八年議准內簾用糾察滿漢御史各一員凡考試等官入院禮部行文太醫院取醫官一員送貢院聽用 凡貢院號房書寫牌面及內簾寫題填榜例取善書儒士八名送貢院聽用 凡貢院需用物件例由工部備辦康熙十年錢糧歸併戶部工部將承辦過會場器皿旗牌等項題交順天府收貯遇會試時禮部行文順天府取用 凡會試供給及匠作人夫并置辦筆墨等項禮部咨取戶部銀五百兩交提調官酌量支發餘銀繳回戶部 凡空白試卷康熙十八年議准鄉試會試順天府預備空白試卷十本交監試御史遇有遺失錯污等項查明給發補換

康熙二十三年

大清會典康熙二十三年題准入場出場簪花筵宴及入場給表裏俱照舊例舉行 又按會典康熙二十三年議准雲南舉人願就教職者就本省考試試卷解送禮部閱定次序移送吏部補

授

康熙二十四年

大清會典康熙二十四年議准仍照舊例分南北中卷

康熙五十二年

萬壽盛典八月

萬壽科會試天下舉人於禮部

欽定知貢舉主考同考等官并八旗直省中式舉人額數八月初一日禮部密題請會試知貢舉主考同考等官初六日

欽點 經筵講官禮部右侍郎兼翰林院學士胡作梅爲知貢舉官 經筵講官文淵閣大學士兼

禮部尙書王揆 經筵講官工部尙書王頊齡兵部左侍郎李先復內閣學士兼禮部右侍郎

沈涵爲主考官翰林檢討蔣肇編修蔡學洙嵇曾筠楊開沅檢討諸起新編修方觀須洲惠士

奇檢討黃越曹掄彬編修徐葆光禮科給事詹嗣祿吏部考功清吏司員外郎陳廷掄稽勳清

吏司員外郎魚鸞翔驗封清吏司員外郎葉弘綬刑部江南清吏司郎中陳元工部都水清吏司郎中陸遐昌爲同考官

八月初十日禮部尙書臣赫碩色謹奏爲請

旨事查康熙五十一年會試滿洲蒙古滿字號取中四名漢軍合字號取中二名雲南雲字號取中三名廣西廣字號取中二名貴州貴字號取中二名其餘各省分南北字號共取中一百四十六名於額外取中五經五名通共取中一百六十四名又額外

欽賜取中十三名康熙五十一年四月內九卿會議具題內稱奉

上諭近見直隸省考取進士額數或一省偏多或一省偏少皆因南北卷中未經分別省分故取中人數甚屬不均今文教廣敷士子俱鼓勵勤學各省赴試之人倍多於昔貧士自遠方跋涉赴試至京每限於額多至遺漏朕深爲軫念自今以後考取進士額數不必預定俟天下會試之人齊集京師著該部將各省赴試到部舉人實數及八旗滿洲蒙古漢軍應考人數一并查明預行奏聞朕計省之大小人之多寡按省酌定取中進士額數考取之時就本省卷內擇其佳

者照所定之數取中如此則偏多偏少之弊可除而學優真才不至遺漏矣著九卿詹事科道確議具奏欽此九卿詹事科道等會議得嗣後會試不必預定額數亦不必編南北字號按各省分編號印卷面既分省分不必復編官民字號止憑文取中其滿洲蒙古漢軍亦編滿洲蒙古漢軍字號直隸各省會試舉人到齊及滿洲蒙古漢軍進場實數禮部預行查明奏聞恭候

皇上酌量省分之大小人數之多寡定額於

命下之日行文主考就各省卷內擇其佳者照所定之數取中等因具

題奉

旨依議欽此欽遵在案今

萬壽開科會試准至公堂查明移開舉人實數滿洲七十一卷蒙古一卷漢軍二十二卷直隸四百九十三卷奉天二十一卷江南三百五十六卷浙江三百五十六卷湖廣二百五十八卷江西二百八十卷福建一百八十卷山東三百三十六卷山西二百二十卷河南三百四卷陝西一

百九十卷廣東一百二十二卷廣西五十卷四川九十九卷雲南八十五卷貴州六十二卷相應奏

聞恭候

皇上欽定取中數目俟

命下臣部交與主考官就各旗省卷內擇其佳者照

欽定之數取中以仰副我

皇上愛育人材公平周密之至意又至公堂移稱分經分房之處仍照舊例遵行五經卷數無幾若再分別恐易徇私應將五經硃卷停其分編滿漢直省各印記等語應將分經分房俱照舊例遵行五經硃卷停其分編旗省各印記可也爲此一并謹

奏請

旨本月十五日奉

旨這會試滿洲蒙古取中四名漢軍取中二名直隸取中二十二名奉天取中一名江南取中三十

名浙江取中二十名湖廣取中十二名江西取中十三名山東取中十五名山西取中十名河南取中十五名福建取中八名陝西取中九名廣東取中六名廣西取中三名四川取中四名雲南取中四名貴州取中三名五經取中五名餘依議

九月初十放榜取中舉人孫見龍等一百八十六名

會試部藝文

詩詞

送錢塘路少府赴制舉

唐皇甫冉

公車待詔赴長安客裏新正阻舊歡遲日未能消野雪晴花偏自犯江寒東溟道路通秦塞北關威儀識漢官共許郊誥工射策恩榮請向一枝看

省試夜

薛能

白蓮千朶照廊明一片承平雅頌聲更報第三條燭盡文昌風景畫難成

省試

司空圖

粉闥深鎖唱同人正是終南雪霽春閒繫長安千匹馬今朝似滅六街塵

奉送周元翁鎖吉州司法廳赴禮部試

宋黃庭堅

江南江北木葉黃五湖歸鴈天雨霜繫船湓城秣高馬客丁結束女縫裳貢書登名徹未央不比長卿薄遊梁南山霧豹出文章去取公卿易驅羊與君初無一日雅傾蓋許子如班揚囚拘官曹少相見忽忽歲晚稼滌場一杯僚友喜多在謝守不見空澄江澄江如練明橘柚萬峯相依摩青蒼暮堂醺醺客被酒艷歌聒醉燭生光椎鼓發船星斗白明日各在天一方寒鴉滿枝二喬宅樽前顧曲憶周郎鱸魚斫膾蔗爲漿恨君不留誰與嘗殿前春風君射策漠庭諸公必動色故人若問黃初平將作金華牧羊客

送徐舉人赴省試

李昭玘

淮夷之珠照夜月泗濱之石聲泠泠昔時大禹致方物神光玉色羅廣庭比年入獻多豪英褒雄妙思相憑陵飄飄束書去觀國瘦馬踏雪鬣垂冰長廊白晝天宇清落筆冉冉風雲生千官拱笏赭袍近碧溝新柳黃鸝鳴金撾虎士傳姓名魚龍卷尾隨雷聲州人洗眼望歸騎會約春風載酒迎

送貢士會試京師

明高啟

國家文治今百年多士孰賚皆知天南宮坐試二三策能使海內無遺賢院門晨開官燭爛白袍鵠
立人五千上談禮樂祖姬孔下議制度輕讎元臨軒曾看宰相賀雲間盡見當臚傳看花或騎太僕
馬錫宴每給司農錢登朝出牧知幾輩冠珮劍舄紛相聯邇來國運屬中圯爭慕死節羞生全潯陽
老守血灑地甬東大將魂沉淵乃知儒術王政本至此正賴扶傾顛諸生區區抱遺籍草萊竄亾亦
可憐南方上公境獨治鹿鳴更欲興賓筵張君幾年客夜雨古檠空案親韋編逢時頗欲見行事豈
但持作求魚筌入場叉手萬言畢衆目一葉驚先穿辭家又隨計吏發京城遠瞻北斗連秋風吹衣
別酒冷枯楊淺水閨門邊君行勿亟我有語落日尙在車衡懸竊聞天子正側席此去爲拜彤庭前
揮毫休奏醴泉頌給札莫賦凌雲篇但當開口論世事號令次第宜何先坐令王綱復大正乾樞共
仰天中璇我今有志未能往矯首萬里空茫然

會試感懷

桑悅

骨肉樂完聚貧賤生別離連年遠行役心死精力疲世途所履歷半篇北征詩茲行懷倍惡重與諸
子辭大女甚哽咽欲語聲不隨意云爺早返免我日夜思次子病初起阿母親扶持母子相對泣侍

婢亦慘悽幼女初發疹生死未可知眼腫不見我涕泪尋縫垂侵晨當發脚脊戀住移時有愛不忍
割愛反割我肌堂上白頭父相送立如痴生我乏孝養重累反相遺天晚日色薄庭葉響枯枝蕭蕭
北風急瘦馬那可騎欲求升斗祿活此老少饑苦無辟穀術可免塵網羈栗里乞菊本淮南分桂枝
三聘不肯顧清風滿茅茨臥龍此時起霖雨八極施而我干明主已枉人共知操竿向齊門定啟後
世疑古來豪傑士所困惟蒸炊

念齋將行爲余作紫峯書館四大字及遊山詩十數首示清脫雅意

陳琛

年少秋風好桂枝唐文甌冷自吾伊北山冒雨敲詩瘦南洞尋仙作字奇定見杏花春信開莫愁梅
嶺馬行遲榮歸若過羅浮下爲我排雲覓紫芝

送林六川會試

前人

萬水千山路三杯半日談功名思遠道勿苦憶江南

代蘇戶部次韻送張舉人春試

前人

未空樽裏酒忽起座中人劍發雙龍焰毫揮五色新行應天借曉笑與物爲春宇宙男兒事寧榮一